

Mit Herzbumbre, feichte Aue un efters Gänsehaut

Beim Bogaroscher Fescht, hinner de Kulissen

Obzwar jetz schun e guti Weil vergang is, seider in Bogarosch es Jubiläumsfescht 250 Jahr Einwanderung mit Kerwei gfeiert is wore, sin ich noch immer nit so ganz zu mer kumm un men manches Mol, ich han des alles nor geträämt. Es war mei große Wunsch, die Feier in die Weche leite zu kenne. Derzu han ich phaar Monate gebraucht. Erscht han ich gedenkt: Zeit genuch is jo! Doch je näkschter es Fescht datum gerickt is, umso meh Seresch han ich kriet.

Ohne die Mithilf vum Bogaroscher MUT-Kinnerheim mit em Verwalter-Ehephaar Iulia un Nicu Marusca sowie de freiwillliche Helfer aus Schwäbisch Hall hätte mer „scheen do gstann“! Sie han es ermeeglicht, dass die Bogaroscher, die angereist ware vun nah un fern, e gemietliche Owet dorte verbringe han kenne. Derzu war e großes Zelt im Hof ufgstellt gewenn, fleißichi Händ han 600 Krautwickle gekocht un als Vorspeis herrlichi Tellre mit Käs, Ufschnitt un anres meh vorbereitet. Tortne un Mehlspeis hat die Doina aus Wojteg gebackt.

Mit Maiebaam un Prozession

Was wär e Kerwei ohne Maiebaam? Der war siewe Meter hoch, in de Nationalfarwe frisch angstrich un mit Blumekron un Bänner. Uf sei altes Platz vor der Kerch hat mer ne nit ufstelle kenne, weil inzwische ke Koppsteenplaschter meh sundern Asphalt is. Im Summergarte wars nit rotsam e Loch zu grawe, weil mer nit gewisst hat, wu die ville Kabel uner der Erd geleet sin. Also is bschloss gin, de Maiebaam im Kerchhof ufzustellen. Desmolrum mit Bagger un Kran, die ehemalige Kerweibuwe han mit Hand angeleet. Am erschte Feschttag war dann e Andacht in der Kerch. Derno mit Marschmusik die Prozession uf de Friedhof, Totededenke un Grabsegnung. Noh em ville Verzähle un gutem Esse im Kinnerheim han sich die friehriche Kerweimädle drangemacht, de Rosmareinstrauß (mir han de vum Billede Deutsche Forum kriet) ufzuputze.

Inlade noh friehrichem Brauch

Dann war de Kerweitag ach schun do. Musikante un Trachtephaare han sich im Kinnerheim zammgfunn un em Ufmarsch hat nix mehr im Wech gstann. Erschter Halt war es Kulturheim (Wertshaus hat mer frieher gsaat). Dort sin de Richter Ilie Suci, de Vizerichter, die Gemeinderäte un Lehrer zur Kerwei mit Appl un Rosmareinstreißl ingelad gin. Em Trachtezug hat sich e rumänischi Folkloregruppe (Schiller der Bogaroscher Allgemeinschul) angeschlossen. Bei der Familie Simina un Cornel Dan hat es Tor einladend weit ufgstann, die Kerweigsellschaft is empfang un bewirt wore. Wie schun gsaat, selmols han ich des alles nit so recht mitkriet. Ständich han ich Herzkloppe ghat, die Aue sin geloff un Gänsehaut han ich a noch derzu kriet.

Kerweiese un guti Stimmung

Noh em Verletzetiare vum Strauß han sich alli im Wertshaus versammelt. De Saal war wunnerscheen un einladend gschmickt. Die Kechin Emilia Rusu un ihre Helferinne han alli Händ voll zu tun ghat. E Gascht war sich im Hof, wus in Kessle gebrutzelt hat, umschaue gang un is ach in die Kich kumm. Er hat gsaat: „Hut ab! Drauß sin 32 Grad Hitz un wie ich in die Kich kumm sin, sin mer die Auegläser angeloff. De Kessl mitm Krumberpiree hat groß 250 angeschrieb ghat. Es Esse war stark gut un hat sicher alli gschmeckt“! Nohmittachs is es dann mit Frohsinn im Summergarte weitergang. Die rumänischi Tanzgruppe hat e Programm mit Volkstänz gebot. Doch es ware Tänzer derbei, die recht gut ach Walzer tanze han kenne. Natierlich han ach die Gäscht es Tanzbeen gschwung. Wie hätt's ach annerschter sin kenne – die Banater Musikante aus Temeschwar han doch zur Kerwei ufgspilt.

Nochmol e Dankscheen an all jeni, die mitgholf han, des Fescht zu gstatte: HOG Bogarosch, Bürgermeisteramt Lenauheim, Banater Forum, der Priesterschar, Sponsore un freiwillliche Helfer!